

Surat khabar: Utusan Sarawak (Berita Perdana)

Hari/Tarikh: 28/9/2013

Muka surat: 2

Tajuk : STEMfest Himpukan Ramai Ahli Akademik Antarabangsa.



PELANCARAN ... Menteri Muda Promosi Pendidikan Teknikal Datu Len Talif Salleh bersama Pengerusi STEMfest 2013 Malaysia, Scott Campbell (tiga dari kanan) dan Timbalan Naib Canselor Penyelidikan dan Inovasi Unimas, Prof. Dr. Peter Songan (dua dari kiri) menunjukkan maklumat ringkas mengenai STEMfest 2013 di Wisma Sumber Alam di Kuching, semalam.

STEMfest himpukan ramai ahli akademik antarabangsa

CHRISTINA ULAU

KUCHING, Jumaat — Sebanyak tujuh persidangan akan diadakan sepanjang berlangsungnya Festival Sains, Teknologi, Kejuruteraan dan Matematik Malaysia 2013 (STEMfest 2013), yang bermula pada 30 September sehingga 10 Oktober ini.

Menteri Muda Promosi Pendidikan Teknikal, Datu Len Talif Salleh berkata, festival yang diadakan di Universiti Malaysia Sarawak (Unimas) Kota Samarahan itu turut diselitkan dengan bengkel dan hari terbuka.

"Ini adalah kali pertama STEMfest diadakan di Malaysia dan kita sangat berbangga kerana Kuching, Sarawak terpilih sebagai lokasi penganjuran festival antarabangsa itu yang bakal menghimpunkan ramai ahli akademik antarabangsa," katanya.

Beliau berkata demikian semasa sidang media Festival Sains, Teknologi, Kejuruteraan dan Matematik (STEMfest) di Wisma Sumber Alam di sini, hari ini.

Kata Len, festival berkkenaan

juga akan memberi peluang kepada warga pendidikan tempatan, pelajar sekolah dan individu yang berminat dalam bidang sains, teknologi, kejuruteraan dan matematik untuk mendapatkan maklumat berkaitan keperluan mereka.

"Festival ini akan dirasmikan oleh Ketua Menteri Pehin Sri Haji Abdul Taib Mahmud pada 30 September jam 2.30 petang di DeTAR Putra UNIMAS," ujarnya ringkas.

Sementara itu, Pengerusi STEMfest 2013 Malaysia, Scott Campbell berkata, sebanyak 12 organisasi antarabangsa berkaitan bidang sains, teknologi, kejuruteraan dan matematik akan menyertai festival tersebut.

"Pada 30 September dan 1 Oktober ini, kita akan mengadakan Hari Terbuka di DeTAR Putra, Unimas bermula jam 10 pagi sehingga 4 petang dan kita mengalu-alukan kehadiran orang awam ke hari terbuka itu," katanya.

Menurutnya, ahli akademik dari universiti terkemuka dari Amerika Syarikat, Australia, Turki dan Nigeria adalah antara individu yang boleh ditemui di

Hari Terbuka berkenaan.

Hadir sama, Timbalan Naib Canselor Penyelidikan dan Inovasi Unimas, Prof. Dr. Peter

Songan dan Ketua Sektor, Sektor Jaminan Kualiti Jabatan Pendidikan Negeri Sarawak, Abang Mat Ali Abang Masagus.